

欽定剿平粵匪方略

欽定勦平粵匪方略卷二百六十六 辛酉年

五月十七日甲辰官文胡林翼李續宜奏言三月

二十六日逆首僞定南黃汝金卽黃老虎率黨
由南岸渡江糾合二萬餘人於天林莊築壘二
十餘座副都統多隆阿揣知該逆必復竄練潭
馬踏石一帶造搭浮橋希圖竄往安慶與狗逆
合遂於二十七日由高河鋪親率兵勇從新安

渡進兵該逆遙擁而來多隆阿當令遊擊藍斯
明等分五營爲三隊以遏賊衆該逆猛撲二次
各營施放槍礮賊多受傷猶抵死拒戰副都統
金順率兩起馬隊從香鋪街截出馬步併擊槍
箭齊施賊敗往天林莊負壘不出計是役殺賊
二千餘名生擒長髮老賊十四名當卽訊明正
法同日該逆以五六千人攻撲掛車河老營協

領穆圖善卽派副將石清吉等各率所部分三路出擊該逆見我軍馬步齊出遂卽過河漸偏營根我軍先以槍礮轟擊賊仍迎敵不退我軍奮力衝殺約三時之久賊見新安渡大股賊衆敗潰乃卽回奔計斃賊五六百名四月初二日多隆阿卽令新安渡十三營拔營過河進攻天林莊賊壘各營分路出擊自新安渡至天林莊

中隔兩河步隊皆鳧水而過距賊營二三里該
逆望風膽落棄壘而逃多隆阿當令金順率各
起馬隊跟蹤追剿令步隊各營將賊壘悉數削
平金順等馬隊追至孔城沿途殺賊約五百餘
名先是首逆陳玉城屯駐集賢關內外與城內
之賊日夜夾攻曾國荃圍師經曾國藩暗調鮑
超一軍合成大吉之軍由集賢關西北進剿適

多隆阿將外援擊退遂由集賢關東北同日進
剿逆首陳玉城知援賊外絕官軍四面合圍留
悍賊數千深濠高壘分踞關內外逆首於初十
日自率馬步賊五六千人連夜由冷水鋪向馬
踏石奔竄多隆阿時已進偪磨山營次聞之卽
派溫德勒克西等統帶十三營弁兵出隊分途
尾追自磨山至馬踏石相距十八里惟曹克忠

王萬年二營由閒道先至楊朝林趙旣發二營
繼之賊至馬踏石河邊見追兵尙少卽督齊隊
伍意欲背水一戰該四營亦列隊牽制不使賊
奔少頃各營先後追及該逆前臨大敵後隔溪
河驟難越遁卽率衆拌死回撲各營奮呼直前
鏖戰二時該逆且戰且退紛紛鳧水過河我軍
乘勝追抵河岸始行收隊計是役斃賊約一千

餘人生擒十一名置諸法溫德勒克西金順所
帶馬隊追至次日及賊於包家大橋該逆踉蹌
而奔馬隊追殺直抵蔣家山賊壘賊衆出隊接
應逆黨退入安慶城內我軍始整隊回營是日
馬隊殺賊六百餘名十四日陳玉城復率僞璋
王林紹僞玕王洪城玕僞定南黃汶金僞格天
義陳時泳暨擒首孫葵億等髮擒共三萬餘衆

馬賊四五百名復圖上犯由掛車河至棋盤嶺
列隊二十餘里欲分三路圍撲我營多隆阿乘
其布置未定先發制人卽於十五日派格通阿
等分路設伏多隆阿親率馬步各營分兵五隊
而出甫至河邊賊已分三路來撲僞英王陳玉
城與僞格天義陳時泳率悍賊四五百人出掛
車河之左僞玕王洪城玕率黨七千餘人自雉

綽塔江家橋出掛車河之中僞璋王林紹與孫
葵億率捻逆一萬餘人由麻子嶺棋盤嶺出掛
車河之右壘賊並未出隊賊之大隊均排於逆
壘之前多隆阿卽飭各營分途接仗往來衝擊
該逆不稍退卻正酣戰閒賊之後隊忽亂溫德
勒克西率所伏馬隊飛騎衝入賊陣各營奮力
夾擊賊卽潰併左路該逆陳玉城等仍敢力拒

惡戰忽項家河散營經舒亮等馬隊馳至焚燒
賊遂慌亂我軍勇氣倍加馬步齊進槍箭如雨
連斃黃衣騎馬賊目十餘名悍賊二百餘名賊
敗向桐城而逃我軍跟蹤追殺約五里許適焚
燒散營各馬隊橫抄而至該逆不敢戀戰奪路
狂奔我軍復合馬步進剿其江家橋麻子嶺一
帶壘賊仍踞未動多隆阿卽飭各營率領馬隊

分撲賊壘親率數騎往來督隊各營將士奮不顧身爭先併進拆毀木城四道我軍前者傷亡後者繼進拋擲火箭八壘同時焚燒賊棄壘欲遁我軍步隊從壘後擊出馬隊環壘圍斬八壘之賊斬殺無遺是時精選中前左三營亦抵黃家鋪與黃逆接仗賊亦敗竄該三營遂將山內賊館悉數焚燬共斃馬賊百餘名步賊八千餘

名生擒二百餘名訊明分別斬釋查此次逆首
僞英王陳玉城自鄂回竄由懷而桐復紆下游
璋環黃孫等衆並擒逆大股上犯希解皖圍我
軍屢次移營迎擊追殺五獲大勝踏平賊壘八
座前後焚破散營及賊館百餘處殺賊不下二
萬餘人實足寒賊膽而伸

天討副都統多隆阿謀勇兼全忠勤尤著兵略精審雖

古名將無以過之可否仰邀優獎之處出自

天恩所有疊次戰功卓著各員相應先行開列奏請獎

敘其餘在事出力人員可否容臣等擇尤保獎

陣亡之千總楊得勝委防禦全安披甲德升驍
騎校四十全星均請

飭部從優議卹以慰忠魂再現在道員劉嶽昭圍攻隨
州臣李續宜圍攻德安總兵鮑超成大吉圍攻

集賢關外賊壘未能即時破滅自黃州至宿松數百里不克分兵兼顧而鮑超一軍本係皖南之師經曾國藩撥援安慶仍須暫留北岸四月十一十二等日據江西探報逆賊僞忠王李秀城一股又已竄踞義甯州武甯縣偏近鄂省邊境臣官文已先後調派知府唐協和等馬步各隊分赴興國崇陽通城通山一帶扼要防剿惟

各邑道路紛歧兵力尙單臣胡林翼應俟集賢
關外賊壘蕩平雨止放晴卽行撥營回剿黃州
並先調撥總兵成大吉胡裕發統率十營勇丁
分剿南北兩岸竄賊奏入

上諭內閣曰此次逆首陳玉城回竄上犯希解皖圍我
軍屢次移營迎擊追殺五獲大勝剿辦甚屬得手著
官文等卽飭統兵各員迅速進攻盡殄醜類毋留餘

孽副都統多隆阿著交部從優議敘總兵雷正綰著
賞加提督銜副將趙旣發曹克忠王可陞副將銜趙
克彰均著賞加總兵銜儘先參將梁洪勝著免補參
將以副將儘先卽補並賞給果勇巴圖魯名號王萬
年著開千總缺免補參將以副將儘先卽補並賞給
壯勇巴圖魯名號儘先遊擊藍斯明譚仁芳均著免
補遊擊以參將儘先卽補並賞加副將銜儘先副將

都統記名簡放舒亮著賞給額爾達木巴圖魯名號
格通阿著賞加副都統銜其餘在事出力人員著官
文等擇尤保奏候朕施恩陣亡千總楊得勝委防禦
全安披甲德升驍騎校四十全星均著交部從優議
卹

官文胡林翼李續宜又奏言頭品頂戴福州副
都統多隆阿樸誠忠勇智略冠軍已荷

聖明洞鑒現值下游髮捻屬集皖境而江西賊氛又復
偏近楚北之通山崇陽等屬邊界撫臣胡林翼
卽日統師回援所有懷桐軍務距鄂較遠多隆
阿威望久著爲衆軍所悅服可否籲懇

天恩飭下多隆阿幫辦楚皖軍務庶於前敵事機隨時
調度更資得力奏入

上諭內閣曰頭品頂戴福州副都統多隆阿著幫辦官

文胡林翼軍務

十八日乙巳瑞昌王有齡奏言上月張玉良統兵

援衢臣等以常山中隔數河江山平坦大道囑其先由江山一路進剿不數日而有壽昌之警賊勢趨重下游張玉良卽折回蘭谿防堵意欲先將壽昌克復免致後顧之憂再爲攻取江常之計其時壽昌逆匪分股竄至三里亭千家村

一帶蘭谿紳士候補知府祝怡瑞等督率民團
各守嶺隘該逆屢攻屢敗不能得志其犯梅嶺
界址嶺之賊亦經官軍擊退而江山逆匪已由
大溪灘下竄後溪街鄭家村等處均有賊蹤十
三日復至落馬橋離衢城僅五里許當經都司
張培基等礮船轟擊賊卽退回十四十五等日
李定太會同署衢州鎮總兵崇志分派隊伍擊

賊獲勝緣兵單未能遠追仍固守待援逃出難
民供稱僞忠王李逆現在柏陵街打館常山之
賊已歸併江山人數實有十餘萬之衆欲一面
攻衢一面下竄等語臣等因蘭谿民團防禦甚
嚴且與壽昌一江之隔蔽船尙能扼堵遂咨商
張玉良仍統全隊先剿犯衢之賊時浙江藩司
林福祥帶勇千名行抵貴溪弋陽一帶已革道

員李元度新募楚勇八九千人計期可抵江西
省城均令其由廣豐江山一路而進會同夾擊
乃十六日該逆越過衢城竄至龍游之靈山全
旺等處其地可下竄龍游蘭谿亦可旁竄處州
之遂昌龍泉各縣當飛咨處州鎮總兵帶兵力
堵並咨商張玉良李定太各派隊伍迎頭截剿
旋據探報十七日巳刻逆匪由草輦嶺直撲龍

游縣城卽於戌刻失守十八日賊由龍游竄往
湯溪十九日復由湯溪竄往金華均被攻陷張
玉良先派副將劉萬德馳赴金華嗣將副將況
文榜遊擊曾得勝兩軍留駐蘭谿親自督隊赴
金援勦因金華已失卽行折回並有退守嚴州
之信臣等聞之不勝憤懣查該逆以壽昌牽掣
我師大股仍從江山一路繞竄而下張玉良株

守一隅未能與李定太聯絡堵剿使賊大受懲
創致三日之內連陷府縣三城其窺伺甯紹更
在意中臣等初令副將文瑞統帶兵勇三千五
百名由諸暨浦江前進方冀力扼賊氛不意金
華又陷日偪日近不得已拙調省城水陸兵勇
馳往紹興歸署甯紹台道張景渠調遣派江蘇
候補道孫士達參將葉聖言赴嵊縣設防一面

咨會前副都御史王履謙迅飭各路練勇民團扼要堵禦一面飛催林福祥李元度等星夜前來闢江常後路漸就肅清賊以全股深入重地果能面面兜剿不難聚而殲旃無如張玉良諸軍殊不得力林福祥所部無多李元度及同知陳大力知縣張振新等新募之勇數以萬計又未能剋期趕到臣等復咨商候補四品京堂左

宗棠統師援浙能否前來更不敢必現在省城
兵勇東徵西調城外營壘大半已空如浙西之
賊再有蠢動祇可嬰城固守而庫藏空虛三軍
枵腹荷戈人心何能固結況甯紹爲餉源所出
設再被擾全局不堪設想即使省城獨存終歸
決裂惟有懇

恩飭下左宗棠來浙應援以至大局而保危疆

瑞昌王有齡又奏言據探四月初二日占踞遞鋪及圍擾孝豐之賊合竄四安初三日在管垓之北承青寺一帶打館初四日由許安突至長興之大東門外城中並無防兵民團不敢抵禦該逆由小西門攻進長興縣城失守時合溪民團及道員趙景賢所派夾浦一軍均隔絕在外初五日賊仍屯踞長興分股到開山之北呂家

巷地方擄掠翻山卽可犯郡一路山徑叢雜防
不勝防趙景賢立飭楊家莊等處練勇嚴加守
備乃長興之賊已於是日分股竄入合溪東西
兩川及八九兩都甚爲危急該道卽令張鼐會
商軍功韓文魁招集水口槍手前往救援詎賊
已至水口焚掠復飭西南灣局董沈平章派隊
會同夾浦及西豐壩民團徑攻水口奮力夾擊

該逆由山路敗回初六日官軍民團會攻長興
該逆固守不出我軍奮勇登城未能得手初七
日八都九都被賊衝破鄉民逃至據云與賊力
戰兩晝夜賊衆且悍抵敵不住兩都同時俱失
初九日僞輔王已到長興正在攻我東西兩川
勢益猖獗並聞宜興所聚礮船不少欲分水陸
兩路進攻其烏鎮之賊初七日出擾仁墩緝里

馬腰一帶經南潯各局立派船勇會同該處民團迎勦適雙林槍船亦到兩面夾攻力戰兩時斃匪三四百名落水死者尤夥奪獲賊船十數隻追至離烏鎮七八里之中塘橋而回該逆仍在緝里近處放火湖城面面受敵實屬萬分喫緊臣等竭力布置兵力尙單深恐支持不易奏入

上命軍機大臣傳諭瑞昌王有齡曰江常之賊連陷龍
游湯溪金華府縣城池北路賊匪竄陷長興本日已
諭知曾國藩令左宗棠一軍迅速援浙矣惟左宗棠
由江西援應浙江必須將江山常山之賊先行掃蕩
始能前進此時金華等城被匪占踞賊蹤業已蔓延
腹地非調撥重兵迎頭截剿則杭州紹興等處斷不
可保張玉良旣不得力何以不行嚴叅撤回任令貽

誤該員此時株守嚴州何能有益著瑞昌王有齡挑
選精兵交饒廷選統帶刻日出省探明何處緊急卽
由何路進剿並將金華等城速籌克復其文瑞一軍
應否歸饒廷選統率之處卽著該將軍等斟酌辦理
一面知照王履謙實力勸諭團練同心禦侮並嚴飭
辦防之道員孫士達等認真防守以保浙東林福祥
李元度兩員所帶兵勇並催令星馳前進相機攻剿

長興失陷湖州岌岌可虞著瑞昌等責成道員趙景賢設法收復以勦爲防惟湖州兵力亦單應如何籌撥勁旅應援著該將軍等妥爲兼顧不可漫無布置

上又命軍機大臣傳諭曾國藩左宗棠曰瑞昌王有齡奏常山江山之賊繞越衢州連陷龍游湯溪二縣及金華府城請飭催援師救應等語該逆以壽昌牽掣我師大股仍從江山一路繞竄而下致三日之內連

陷府縣三城猖獗已極其窺伺甯紹更在意中張玉良各軍不能得力藩司林福祥帶勇千名甫抵貴溪弋陽一帶已革道員李元度新募楚勇八九千人計方抵江西省城未能剋期趕到浙省情形萬分喫緊必須設法應援左宗棠一軍屢獲勝仗聲勢頗壯卽著統帶所部剋日起程應援浙江會同瑞昌等所派官兵將失陷城池次第收復毋稍延緩

上諭內閣曰瑞昌王有齡督辦軍務不惟毫無成效且屢失郡縣已失者久稽克復完善者未聞保障之方本日奏到又失一郡三邑屢次奏報亦從未自請處分殊屬膽大瑞昌王有齡均著革職留任以示懲儆瑞昌王有齡又奏言昌化踞賊仍在城中四月十三十四等日又有另股賊匪陸續由績溪竄至十都九都等處有逃出難民供稱賊目楊姓

藍姓係僞晉王部下之人春閒曾在分水盤踞五十餘日聲言俟大股到齊一由分水進撲嚴郡一由臨安竄犯省城人數不下數萬等語查前因於潛昌化久爲賊踞調派副將陳步高會同民團進攻不意行抵分水卽聞江常之警仍折回嚴州賊益無所忌憚今大股希圖分犯嚴州旣兩面受敵杭省亦存兵無多且各庫空虛

餉需無繼以視前數月情形尤爲危急奏入報

二十四日 辛亥 山西道監察御史華祝三奏言上

年賊陷蘇常兩江督 臣 曾國藩駐軍祁門力圖

規復一切餉項均取給於江西卽浙省軍火等

件亦半賴江西接濟是江西實爲東南數省關

鍵乃自去秋廣東樂昌仁化之賊出巢肆擾由

江西南贛分竄常都撫建廣信連優數十州縣
本年春閒玉山解圍復由河口東鄉金谿圍攻
撫建由宜黃崇仁竄入臨江府屬之樟樹鎮新
淦縣攻陷吉安圍撲袁州占踞瑞郡頃聞奉新
靖安豐城及新建縣之生米鎮等處均有賊壘
窺伺省垣居民岌岌危殆萬分錢糧釐金來源
俱竭臣聞江省軍餉月需四十八九萬兩一年

需五六百萬兩現在各營欠餉至四五月之多
兵勇饑疲紛紛思潰近有李金暘者在臨江帶
勇降賊爲賊先驅揆厥由來半由欠餉過多無
以爲生所致近日賊勢益熾若不迅圖殄滅全
省大局將不可問再四思維惟有懇

恩飭下督臣曾國藩迅派得力將弁酌帶勁旅數千馳
赴江西省城分投勦洗以次廓清腹地俾皖南

各營餉源不匱藉可牽制賊後不使逆匪併力
擾害浙省庶東南大局尙可徐圖奏入

上命軍機大臣傳諭曾國藩曰御史華祝三奏請飭曾
國藩速派勁兵赴江西省城並分投勦洗等語粵匪
闖入江西肆行竄擾除樂平浮梁鄱陽等處肅清已
據曾國藩奏報玉山廣豐撫州建昌廣信等城解圍
吉安新淦失守卽復已據毓科奏報外現在各屬匪

蹤尙未淨盡曾國藩統轄該省且軍營餉需全賴江西接濟自應亟籌埽蕩南昌爲省垣重地尤不可稍有疏失著曾國藩斟酌緩急應如何應援江西省城及將袁臨等處賊匪分別剿洗之處妥爲籌辦毋任賊勢蔓延副將李金暘據毓科奏派令援剿吉安於龍王廟地方失利退保安福是否降賊並著該大臣查明具奏

二十五日

壬子

胡林翼奏言賊首陳玉城自疊經

痛勦竄赴桐城後勢孤無援況多隆阿馬步全
軍一萬餘人仍駐桐城之掛車河屹然難犯鮑
超一軍亦不下萬人現經曾國藩飭令進勦宿
松仍可爲集賢關聲援曾國藩近駐東流與安
慶相隔咫尺尤可隨時策應是安慶勦辦事宜
兵力已厚曾國荃得專意與水師穩守圍攻無

庸臣遠爲顧慮也惟鄂省蘄黃各城邑被賊久踞逆匪僞忠王李秀城一股由吉安瑞州竄踞義甯州武甯縣偏近湖北通山通城崇陽大冶興國邊界各州縣羽書紛至安徽撫臣李續宜圍攻德安又分駐黃岡新洲等處以固武漢之門戶兵分力單兼顧爲難臣現駐太湖縣城下游旣已解嚴卽當親督成大吉一軍回剿上游

相其緩急先援南岸再攻斬黃全軍現已進發
臣定期於五月十二日起程臣自去冬患病數
月纏綿近日諸病漸輕惟吐血尙未能愈鄂省
係臣轄地武昌尤全局根本際此南北兩岸軍
務急迫不敢不力疾從事以冀及早肅清其潛
山太湖兩城均經留兵固守一切守具軍火尙
爲充實不致疏虞奏入報

二十六日
癸丑 慶端奏言汀郡踞逆於城外徧紮

賊營意圖久踞臣當飭總兵曾玉明暫革候補
道張啟煊等督率各軍策勵民團分路進剿四
月初九日副將林文察等追賊至長坑地方生
擒長髮賊匪九名十二日張啟煊督隊出哨遇
賊於十里鋪我軍四面包抄生擒僞師帥鍾觀

海一名正法餘匪敗走統計斃賊三百餘名十三日張啟煊等親率兵勇直擣郡城城外之賊列隊拒敵張啟煊等督軍齊進突有城內逆匪由南門擁出我軍分投截擊勇氣百倍斃賊多名十四日張啟煊親督都司陳元彩等帶隊進攻林文察等率部分路策應合力奮擊賊匪敗退入城張啟煊卽分帶兵勇環攻城垣林文察

先將西門賊卡焚燬通判徐慶崧等用大礮轟塌逆壘賊匪死者甚衆該逆馬隊由東門衝出南北兩門復有大股強擁而來我軍分投勦殺該逆抵死抗拒張啟煊等揮軍開放槍礮賊不能支奔逃入城是夜張啟煊等傳令各軍合力圍攻兵勇各將火器拋擲城內該逆驚惶無措曾玉明親統後隊馳至四面攻擊該逆自相踐

踏死者枕藉我軍攻破東門殺死守城悍賊二百餘人賊開西門竄逃我軍追殺十餘里沿途斬馘無算餘逆逃赴江西瑞金一帶於十六日將汀州府城克復逆首童大鑼卽童容海業被我軍殺斃查各軍先將姑田賊巢攻破克復連城茲汀州又經攻拔旬日之內連下兩城逆首伏誅大局轉危爲安惟江浙兩省賊氛正熾閩

省上游各屬關隘紛歧防範仍難稍鬆原調各軍一時未能撤動現將餘匪認真搜捕並將善後事宜妥籌辦理所有首先出力文武各員前於克復連城摺內聲明由臣存記今該員等又克郡城相應開列籲懇

恩施分別獎敘其餘出力員弁兵勇聯董人等容俟查明另行保獎至建甯府屬之崇浦松政四縣緊

偏鄰氛現撥兵勇分路嚴防並約會浙軍夾擊以解衢郡之危兼顧閩省門戶

慶端又奏言福建福甯鎮總兵曾玉明先因逆

匪竄陷汀郡連城經臣由衢防調回該總兵馳

抵延郡正值大股悍逆圖竄延平情形危急當

卽拔隊由永安進紮小陶連日攻勦獲勝將姑

田賊巢踏毀復督各路兵勇先後收復郡縣兩

城行軍穩練調度合宜洵提鎮中不可多得之
員可否仰懇

天恩量予優獎之處出自

鴻慈奏入

上諭內閣曰福建汀州府踞匪於城外徧紮賊營意圖
久踞總兵曾玉明等率兵攻勦進擣郡城於十六日
將汀州府城克復辦理尙爲迅速著慶端督飭將士

將敗殘餘匪速行搜捕毋任漏網並將善後各事宜
妥爲辦理此次尤爲出力之暫革記名道張啟煊著
開復原叅暫行革職處分仍交軍機處記名遇有福
建道員缺出請旨簡放代理汀州府知府張銓慶著
交軍機處記名遇有福建道員缺出請旨簡放代理
長汀縣知縣趙均著免補知縣以同知留於福建遇
缺卽補並賞戴花翎通判徐慶崧著以同知留於福

建補用並賞戴藍翎副將林文察著交軍機處記名
遇有總兵缺出請旨簡放遊擊楊三益著以參將儘
先補用都司黃大雄著以遊擊留於福建儘先補用
楊三益黃大雄並均賞換花翎其餘出力員弁兵勇
聯董人等著慶端查明奏請獎敘另片奏總兵曾玉
明調度合宜戰功卓著懇恩優獎等語福建福甯鎮
總兵曾玉明著交軍機處遇有提督缺出提奏

二十九日丙辰官文曾國藩奏言據候選道曾國

荃稟稱四眼狗陳玉城率馬步悍賊由楚北回
援安慶三月十八日至集賢關內焚燒房屋該
逆騎馬親至後濠往來窺伺二十日賊分大股
而來自毛嶺東至蕭家勘紮營二十餘里旗幟
林立該逆率黨列隊菱湖北岸城賊葉芸來亦
率黨出城列隊菱湖南岸以爲接應我軍環濠

屹立不動賊不敢偏惟連夜於菱湖北岸築壘
十餘座城賊亦於南岸增壘五座城中出賊划
至湖中以通往來二十一日曾國荃商請水師
提督楊載福調蔡國祥全營礮船由東岸駛入
菱湖兼派曾貞幹蕭孚泗各營出濠護衛礮船
狗逆遂分大隊捲旗疾趨由蕭家壩擁擠而來
蕭孚泗由中路堵禦多有斬獲忽賊馬數百騎

由右路抄來將蕭孚泗圍在垓心趙其拔力戰
死之曾貞幹急派張勝祿帶隊出濠接應槍礮
齊施蕭孚泗衝突出圍仍大呼回軍陷陣殺賊
百餘名賊衆潰退是時蔡國祥礮船二十餘號
已入菱湖轟擊岸賊奪獲賊船二十三日楊載
福又調唐學發三板船十餘號入菱湖助戰轟
賊最多惟狗逆督率羣賊增修礮壘漸加逼近

曾國荃與楊載福會商東路湖邊有要地須先據之爲水師安泊之所乃可制壘賊之縱橫二十六日派周萬倬等營出東路扼要修壘狗逆果欲以死力爭此要地率大股悍賊連番猛撲槍子如雨我軍以一半接戰一半修壘一晝夜而壘成二十七日周萬倬派劉祥勝率隊與水軍扼守新壘兩日之內水陸各營槍礮齊施共

斃賊五百餘人內有賊目二名我軍中賊槍礮
陣亡數十名受傷六百餘名然自是我軍水陸
穩守嚴密無隙可乘適多隆阿大軍及鮑超成
大吉兩軍均旦夕將至狗逆自知走入絕地遂
謀逃遁於四月初四五六等日陸續進屯關外
初七日曾國荃與彭毓橘率步隊八十餘人並
楊鎮南馬隊百人至關外審看地勢陰與援軍

約會夾擊甫近賊壘狗逆分數路來撲馬步據險列陣以待該逆疑我師爲誘敵恐山後有伏遽止不前官軍始行收隊適毛嶺之賊將近後濠曾國荃卽派本營數哨出濠迎擊槍隊排轟追逐共殺賊八十餘名日已將晚狗逆又督大隊繼進我軍仍憑濠以待賊不敢犯據探狗逆率黨於初十日晚由馬踏石鼻水而遁尙於關

外赤岡嶺留賊壘四座關內近濠留賊壘十三
座以爲死守待援之計曾國荃見關內之賊占
踞死守非一時所能攻克惟作長濠圍之以斷
其去路則不攻而自困十三日派副後長勝吉
中信孚等營共二千餘人分八壘駐紮又於東
路吉左營抽撥二哨紮蕭家勘隄埂以蔽船護
之又調樅陽之吉中等營紮蕭家勘湖邊各營

通力合作開挖夾濠現在十三賊壘盡在屯圍之中仍加意嚴防不敢疏忽等語查此次逆首陳玉城以全力來援安慶該道所統圍城之師前後受敵乃會同水師從容布置使該逆終不得逞志將弁兵勇疊次苦戰拒退悍賊亦皆著有勞績應懇

天恩俟克復城池後彙案保獎其陣亡員弁容查明另

行請卹以慰忠魂

同日官文胡林翼李續宜奏言逆首僞忠王李秀城一股自竄踞義武兩城後裏脅不下七八萬人卽由興國內犯臣官文前派駐軍興國之知府唐協和等三營勇丁二千三百餘人營總花凌阿馬隊百餘名其分防崇陽通城大冶通山之副將何紹彩等各營亦止五六百人四月

二十八九等日該逆二萬餘衆分三路直犯興國之溪口唐協和等亦分三路迎勦馬隊槍箭齊施斃賊數百逆勢稍卻五月初二三等日該逆復添大股一犯通城之苦竹南樓二嶺一犯通山之蛇箭嶺參將唐敏興等帶勇堵擊因衆寡不敵至失要隘團勇潰散我兵立腳不住賊卽紛紛竄入各境直抵崇陽縣屬之白霓橋等

處惟時竄伺興國之賊日聚日衆署該州知州
徐芝會同唐協和等竭力守禦詎初四日寅刻
賊衆漫山徧野圍撲營壘已革副將余際昌等
馬步鏖戰竟日斃賊千餘是夜三更該逆又糾
合本地土匪抄襲我軍後路唐協和等因賊衆
十倍於我且戰且退衝出重圍初五日至大冶
境內收集隊伍該逆又率衆犯大冶縣屬之棲

儒橋等處代理知縣王壻會合唐協和等整隊
接仗斃匪百餘人該逆分竄四鄉擾及連界之
武昌縣適管帶礮船之遊擊曾紹霖等突起轟
擊斃賊數百人敗賊退竄興冶現在南岸逆氛
距鄂垣較近臣官文已咨商臣李續宜由北岸
新洲拔營親統所部勇丁三千餘人於初八日
渡江至省卽於省城東門外二十里之魯家港

要隘紮營妥籌戰守又派署荊州右翼副都統
巴揚阿督帶遊擊王允昌等馬步各軍共三千
餘人於距省六十里外之東湖站及紙坊一帶
擇要駐守相機進剿臣等又派統帶水師之廣
東按察使彭玉麟分派礮船將長江上下及湖
內湖外各港節節堵遏先後轟燬賊船不下數
百號江面尙稱安靜臣胡林翼先經抽調總兵

成大吉胡裕發統率十營回援臣官文等已飛飭兼程來省上下夾擊以期一鼓蕩平臣胡林翼亦已由太湖拔營由水路上駛日內即可到省刻下省城內外及漢陽漢鎮防堵穩固臣官文率同在城文武固守省垣可保無虞至德安隨州踞逆經我兵四面圍剿疊次斬馘多名賊勢已形窮蹙現仍設法進攻以期速克堅城均

奏入報

聞

三十日丁巳瑞昌王有齡奏言金華府城失陷後

該府知府王桐糾集各鄉民團力圖規復查有
在籍總兵余萬清籍隸義烏臣等以其久歷戎
行堪以督辦金華防務屢與客商該總兵力言
病廢已久不能赴郡督防而以辦理鄉團自任

未幾郡城已陷該總兵忠憤勃發力疾扶持親赴各鄉勸辦數日之內集得丁壯二萬餘人聯絡堵禦該逆時出城擄掠均被民團擊敗斬獲甚多臣等疊准來函請撥兵會同進剿當卽撥解軍火並餉銀一萬兩以資接濟一面飭令副將文瑞分兵防守浦口卽統大隊由諸暨義烏而進兼調遊擊曾得勝帶勇六百名歸文瑞調

遣爲會攻金華之計先是張玉良由金華退回
蘭谿沿途兵團互鬪多有殺傷張玉良卽暫退
嚴州分紮三河大洋等處嗣聞賊欲竄蘭仍於
二十三日督隊前進尙未到防該逆已乘機下
竄蘭邑防兵甚單抵敵不住遊擊賀秉鈞等督
帶礮船奮勇轟擊以無陸軍接應亦難得手前
署金華府知府程兆綸蘭谿縣知縣湯金策督

國在南門外扼紮賊卽從南門之落嶺背繞入
東門民團登時星散蘭谿縣城遂於二十三日
失守是日金華之賊復分股從白嶺洞一帶直
撲武義縣之北門該處並無防兵知縣惠世昭
督團堵剿衆寡不敵被賊遙擁而入縱火焚燒
武義縣城亦失臣等聞信倍深憤懣查武義一
路可南竄處州杭嚴兵力均不能兼顧祇有咨

行溫處鎮道嚴密堵禦而蘭谿爲金衢關鍵水
陸咽喉尤不可任賊久踞臣等仍飭程兆綸收
集團練並派副將黃廷芳礮船駛赴蘭江聯絡
攻剿嗣准張玉良咨稱四月二十五二十六等
日該提督進攻蘭谿踏破河東賊卡兩道五月
初一日攻破城外賊壘二座圍牆一道並剿退
北門逆匪等語臣等囑其嚴申紀律聯絡民團

共圖克復惟探聞壽昌之賊已竄過小番嶺欲
與蘭邑相通而昌化股匪又由東陽竄至富山
嚴州亦形喫緊防不勝防文瑞一軍因大雨經
旬沿途阻滯義烏民團望兵甚急刻有解體之
虞惟有飛催文瑞曾得勝等剋期會剿速拔堅
城現據諸暨縣知縣稟稱已於初六日由該縣
拔隊前進其訛連金華之仙居嵎縣等處尙稱

安堵業經節節設防並派運司莊煥文督率兵勇八百餘名馳赴紹興會同王履謙及臣等前派之道員彭斯舉辦理城守防堵事宜務保完善

同日王履謙奏言甯紹兩府爲浙東完善地方該逆垂涎已久連日探報並准撫臣咨會龍游湯溪先後失守該逆率衆直撲金華於四月十

九日府城被陷現在浦江義烏等縣危在旦夕
臣聞信不勝憤懣該逆旣悉衆下竄攻陷金華
其爲注意甯紹冀由旱路內犯已可概見必須
先防陸路方免意外之虞惟諸嵎地方並無重
兵駐守僅資民力聲勢甚孤軍火器械又諸形
不足寇氛密邇尤屬岌岌可危昨准撫臣咨會
已派副將文瑞統帶兵勇從諸暨浦江義烏一

帶探明賊蹤迎頭截剿並派參將葉聖言等分
帶弁兵赴紹防堵臣思守城不如守險防近不
如防遠與其株守郡城坐待寇至莫若併力迎
剿尙合機宜當咨商撫臣飭令葉聖言等速赴
諸嵎等處扼要駐紮一面由臣派令主事何惟
俊馳赴諸暨知縣周桂攀馳赴嵎縣會同該縣
紳士集團防守仍催員外郎謝敬將所調餘姚

練丁一千名星夜兼程馳往以爲後路接應陸路雖已布置而水路亦不可不防所有沿江守禦事宜責成編修鍾寶華郎中施本認真經理一面會同前臬司段光清紹興府知府懷清親歷各要隘妥爲布置一俟部署周密仍卽馳回府城居中策應以鎮人心所需勇糧及一切經費郡局無別款可籌不得不動支捐輸已飭懷

清派委妥員設局支應仍由臣督飭該府縣等
催收捐輸源源接濟如用項有餘仍當解省濟
餉斷不敢顧此失彼均奏入

上命軍機大臣傳諭瑞昌王有齡王履謙曰逆匪由金
華竄陷蘭谿其爲窺伺紹興實在意中瑞昌等現飭
余萬清扼守義烏文瑞防守浦江進規金華係爲保
衛紹郡起見惟嚴州爲北竄要路且有昌化股匪蔓

及富山情形尤爲喫緊該府設有疏虞則杭紹兩屬
均不可保張玉良恇怯無能豈應聽其貽誤著瑞昌
王有齡嚴飭該提督迅將金華蘭谿兩城克復儻不
知振作卽著嚴叅懲辦並遵照前旨挑派官兵交饒
廷選統帶剋日前赴嚴州一帶督率各路兵勇相機
攻剿籌復各城不得株守省垣致成坐困武義賊匪
難保不南竄處州並飭溫處鎮道嚴密堵禦至諸暨

嵯縣爲紹興緊要門戶王履謙已派主事何惟俊等
分赴各縣防守卽著督飭該紳士等同心禦侮毋得
有名無實勇糧及一切經費准其於捐輸項下動用
如有贏餘仍解省城濟餉惟民團非與官兵相輔難
期得力仍著瑞昌等催令派赴紹興之參將葉聖言
等軍星馳前赴諸暨嵯縣等處確探賊情相機進剿
王履謙務當督同莊煥文彭斯舉及段光清等將城

守防堵各事宜悉心籌商力保完善